

**Uunga siunnersuut: Kalaallit Nunaanni Inatsisartunut qinersisarneq pillugu  
Inatsisartut inatsisaata allanngortinneqarneranik Inatsisartut inatsisaat nr. xx, uu.  
qqqq 2018-imeersoq.  
(Partiit qinigassanngortitsisinnaatitaanerak, namminersorneq pillugu inatsimmi  
taaguutinut naleqqussaaneq, inatsisiliornerillu allanngornerisa malitsigisaannik  
iluarsiinerit)**

**pillugu**

**Inatsisinut Ataatsimiititaliap**

**siunnersuutip aappassaaneerneqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai

Inatsisartunut ilaasortaq Anders Olsen, Siumut, Siulittaasoq  
Inatsisartunut ilaasortaq Aleqa Hammond, Nunatta Qitornai  
Inatsisartunut ilaasortaq Justus Hansen, Demokraatit  
Inatsisartunut ilaasortaq Stine Egede, Inuit Ataqtigiit  
Inatsisartunut ilaasortaq Mikivsus Thomassen, ataatsimiititaliami sinniisoq, Inuit Ataqtigiit

**1. Siunnersuut pillugu**

*1.1. Partiit qinigassanngortitsisinnaatitaanerak pillugu maleruagassanik atuuttunik  
allannguineq*

Maleruagassat ullumi atuuttut malillugit partii Inatsisartunut qinersinermi kingullermi  
Inatsisartunut ilaasortaataqalersimaguni sulilu ilaasortaataqaruni  
qinigassanngortitsisinnaatitaavoq.

Partii piumasaqaammik tamatuminnga naammassinninngitsoq (tassunga ilanngullugu partii  
nutaaq) qinigassanngortitsisinnaatitaavoq qinersineq kingusinnerpaamik sapaatit akunnerinik  
tallimanik sioqqullugu qinersisartunik ikinnerpaamik Inatsisartunut qinersinermi kingullermi

taasinerit atorsinnaatitaasut tamavimmik 1/31-iisa nalinginit amerlassuseqartunit Qinersinermut Ataatsimiititaliamut nalunaarutigineqartoq. Piumasaqaat tamanna isumaqarpoq partii nutaaq Inatsisartunut qinersinermit qinigassanngortitsisinnaassaguni qinigassanngortitsisunit 1.000-ingajannit atsiornernik katersisariaqassammat.

Partiit qinigassanngortitsisinnaanerinut aalajangersakkat pingaarnertut siunertaraat partiit ikinnerpaamik ataatsimik Inatsisartunut ilaasortaatitaqalernissamut naammattunik qinerneqarnissaminnut naatsorsuutigineqarsinnaasut kisimik qinigassanngortitsisinnaanissaasa qulakkeerneqarnissaa:

Partii qinersisartunit atsiornernik, taasinerit Inatsisartunut ilaasortaatitaqalernissamut qulakkeerinnittut amerlaqataannik katersisinnaappat partiip Inatsisartunut ilaasortaatitaqalernissaanik qulakkeerinnittumik amerlassusilinnik qinersiseqarsinnaanera ilimanarsinnaavoq.

Atsiornernilli katersineq partiimut piffissamik nukinnillu atuiffiuvoq, soorluttaaq atsiornernik kisitsineq akuersissutiginninnerlu Qinersinermut Ataatsimiititaliap allatseqarfianut allaffissornikkut nammakkersuutaasoq.

Taamaammat partiit qinersinermit kingullermi Inatsisartunut ilaasortaatitaqalersut atsiornernik katersisussaataannigillat. Qinersinermi kingullermi ilaasortaatitaqalersimanerisa naammattunik qinersiseqaqqissinnaanerat ilimanarsisippaa.

Inatsisilli ullumikkutut oqaasertalerneqarnera malillugu partii qinersinermit kingullermi ilaasortaatitaqaliinnarani aatsaat suli ilaasortaatitaqarpat katersisussaataannigineq atuutissaq.

Iisimasat malillugit partiimik kingullermik qinersinermit ilaasortaatitaqalersumik, ilaasortat qinersiviup ingerlanerani partiinut allanut nuunnerat, taamaalillunilu partii qinersinissap nalunaarutigineqarnerani Inatsisartunut ilaasortaatitaqannginnera pissutigalugu qinigassanngortitsisinnaatitaanermik (toqqaannartumik) ataasiaannarluni annaasaqartoqartoqarsimavoq.

Tamatumani toqqaannartumik qinigassanngortitsisinnaatitaanermut piumasaqaat alla taanna (partiip qinersinermit kingullermi ilaasortaatitaqaliinnarani sulili ilaasortaatitaqartussaanera) qaqutigoorluinnartumik immikkut sunniuteqarpoq.

Inatsisissatut siunnersuut Namminersorlutik Oqartussanut aningaasaqarnikkut allaffissornikkullu annertuumik kinguneqartussatut ilimananngilaq.

## 1.2. *Allannguutit allat*

Tamatuma saniatigut siunnersuutip nassatarissavaa Inatsisartut inatsisaata (pisariaqartinneqartumik) nutarterneqarnera, taamaalillutik Inatsisartut inatsisaanni inatsisinut atorunnaarsinneqarsimasunut allanillu taarserneqarsimasunut innersuussinerit malitsitut iluarsineqarput, taamaalillunilu Inatsisartut inatsisaanni oqaatsit atorneqartut Namminersorneq pillugu inatsimmut naapertuuttunngortinneqarlutik.

## **2. Naalakkersuisut akissuteqaataat**

Naalakkersuisut inatsimmik annertunerusumik nutarterinissamik isumaliuteqartut aammalu 2020-mi upernaakkut ataatsimiinnermi Inatsisartunut qinersisarneq pillugu Inatsisartut inatsisissaattut siunnersuummik saqqummiussisinnaaneq neriuutigigitsik Naalakkersuisut akissuteqaamminni ilisimatitsissutigaaat,.

Naalakkersuisut tamanna tunngavigalugu inatsisissatut siunnersuutip itigartitsissutigineqarnissaa inassutigaaat, taamaattorli siunnersuut itigartitsissutigineqassagaluarpas – allannguutissatut siunnersuutigineqartut inatsisissatut siunnersuummut Naalakkersuisunit saqqummiunneqalersaartumut ilanngunneqarnissaat isumaliutigiumallugu.

## **3. Inatsisissatut siunnersuutip siullermeerneqarnera – Inatsisartut inatsisaannut atuuttumut tunngatillugu suli allanngueqqinnissamik kissaateqarneq**

Inatsisissatut siunnersuutip siullermeerneqarnerani Inatsisartut inatsisaanni atuuttumi allanik ataasiakkaanik allannguinnissamik partiip tungaanik kissaateqartoqartoqarnera pillugu partiimit tikkuasoqarpoq.

Allannguutit taakku inatsisissatut siunnersuummit saqqummiunneqartumit killiliussat avataaniipput taamaalillutillu saqqummiunneqaaqqaartumik tunngaviatigut allannguinninnissamik piunasaqaat pissutigalugu inatsisissatut siunnersuummut pineqartumut allannguutissatut siunnersuutinik saqqummiussinikkut akuersissutiginnikkullu ilanngunneqarsinnaassanatik.

Naalakkersuisunit ilisimatitsissutigineqarpoq Naalakkersuisut inatsimmik annertuumik iluarsartuusseqqinnissamik isumaliuteqartut, Inatsisartunullu qinersisarneq pillugu Inatsisartut inatsisissaattut siunnersuummik 2020-imi upernaakkut katersuunnermi saqqummiussinissaq naatsorsuutigineqartoq.

## **4. Inatsisinut Ataatsimiititaliap inassuteqaataa**

Naalakkersuisunit ilisimatitsissutigineqarpoq Naalakkersuisut inatsimmik annertuumik iluarsartuusseqqinnissamik isumaliuteqartut, Inatsisartunullu qinersisarneq pillugu Inatsisartut inatsisissaattut siunnersuummik 2020-imi upernaakkut katersuuunnermi saqqummiussinissaq naatsorsuutigineqartoq.

Tamanna tunngavigalugu inatsisissatut siunnersuutip matuma itigartitsissutigineqarnissaa ataatsimiititaliap isumaqatigiittup inassutigaa

Ataatsimiititaliali Naalakkersuisut kaammattorpai inatsimmik iluarsartuusseqqinnermut suliarineqartussamut inatsisissatut siunnersuummi matumani imarineqartut assigiinngitsut Naalakkersuisunit ilanngunneqassasut.

Inatsisinut Ataatsimiititaliap taama oqaaseqaateqarluni siunnersuut aappassaaniigassanngortippaa.

---

Anders Olsen  
Siulittaasoq  
*Siumut*

---

Mikivsuk Thomassen  
*Inuit Ataqatigiit*

---

Justus Hansen  
*Demokraatit*

---

Stine Egede  
*Inuit Ataqatigiit*

---

Aleqa Hammond  
*Nunatta Qitornai*